

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATUK LIANG TECK MENG
[SIMPANG RENGGAM]**

TARIKH : 18 MEI 2016 [RABU]

SOALAN : 15

Datuk Liang Teck Meng minta **PERDANA MENTERI** menyatakan jumlah pinjaman, pencapaian, respon dan status terkini skim pinjaman di bawah Koperasi Jayadiri Malaysia Berhad (KOJADI) dan Yayasan Penjaja dan Perniga Kecil 1Malaysia (YPPKM) yang ditaja oleh Kerajaan bagi membantu usahawan perusahaan kecil dan sederhana kaum Cina.

**JAWAPAN: (Oleh YB Datuk Seri Mah Siew Keong, Menteri di
Jabatan Perdana Menteri)**

Tuan Yang Dipertua,

Skim Kredit Mikro Penjaja dan Peniaga Kecil Kaum Cina telah dirasmikan oleh YAB Perdana Menteri pada 2 April 2015. Dengan dana pinjaman sebanyak RM30 juta, Unit Pembangunan Penjaja dan Peniaga Kecil (UPPPKWH) di bawah Jabatan Perdana Menteri telah menubuhkan Yayasan Penjaja dan Peniaga Kecil 1Malaysia (YPPKM) untuk mengoperasikan skim ini.

UPPPKWH telah membantu YPPKM untuk mempromosikan skim ini dengan mengadakan sesi dialog dan taklimat di seluruh negara. Selain daripada itu, sebanyak 50 sesi pameran telah diadakan di pusat penjaja, tapak pasar malam, pasar pagi dan pasar awam di seluruh negara. YPPKM juga bekerjasama dengan Gabungan Persatuan Penjaja dan Peniaga Kecil Malaysia dalam usaha penyaluran maklumat dan panduan permohonan skim.

Skim ini pada asalnya berfokus untuk memberi 3 kategori pinjaman, iaitu RM5000, RM10000 dan RM15000 kepada golongan penjaja dan peniaga kecil kaum Cina untuk memulakan perniagaan, memperkembangkan perniagaan atau menyelesaikan masalah aliran tunai. Setakat ini, 97% daripada permohonan telah memohon amaun pinjaman yang maksimum iaitu RM15,000 dan 3% sahaja yang memohon jumlah pinjaman RM10,000 dan RM5,000. Mulai April tahun ini , YPPKM telah mewujudkan kategori pinjaman RM20,000 atas

maklum balas daripada pihak perwakilan persatuan penjaja dan perniagaan kecil.

Memandangkan sambutan terhadap skim ini semakin baik dan berjaya menggalakkan lebih ramai menceburi dalam bidang perniagaan, YAB Perdana Menteri telah mengisyiharkan RM20 juta untuk skim ini dalam Bajet 2016, menjadikan dana pinjaman yang diperuntukkan untuk skim ini melalui YPPKM adalah sebanyak RM50 juta, iaitu RM30 juta pada 2015 dan RM20 juta pada 2016.

Sehingga April 2016, sebanyak 1,306 permohonan telah dikemukakan dan sebanyak 862 (66%) permohonan telah diluluskan. Daripada 862 permohonan yang telah diluluskan, sebanyak 660 pinjaman telah disalurkan kepada pemohon. Terdapat 215 (16.5%) permohonan telah ditolak dan sebanyak 229 (17.5%) permohonan masih dalam pertimbangan.

Berkaitan dengan skim pinjaman di bawah Koperasi Jayadiri Malaysia Berhad (KOJADI), pada 5 Jun 2015, YAB Perdana Menteri telah melancarkan dana pinjaman mudah berjumlah sebanyak RM50 juta khusus untuk membantu usahawan kaum Cina Malaysia memperluaskan perniagaan mereka. Dana tersebut mendapat sambutan menggalakkan daripada komuniti perniagaan dengan hampir 1,000 pemohon sehingga hari ini. Dalam pada itu, dana ini diurus dan dikawal selia oleh KOJADI.

Antara objektif Skim Pinjaman Mudah PKS RM50 Juta Kaum Cina adalah untuk menyediakan pembiayaan kepada sektor PKS Kaum Cina dengan tujuan untuk digunakan sebagai penambahan modal

kerja atau perbelanjaan, pembentangan projek, perolehan jentera ataupun ringan dan peralatan, dengan mengikuti syarat-syarat dan tetapan berlandaskan kepada undang-undang Malaysia.

Pada 27 Julai 2016, dana pinjaman sebanyak RM50,440,000.00 telah diluluskan kepada pemohon seluruh Malaysia. Jumlah tersebut termasuk RM440,000 jumlah dana yang telahpun dibayar balik. Justeru penambahan dana sebanyak RM50 juta telah diperuntukkan dalam Bajet 2016.

Jumlah RM 50,440,000 telah diluluskan yang terdiri daripada 249 buah kes. Dengan jumlah keseluruhan permohonan sebanyak 1,060 telah dicatatkan. Sehubungan itu, jumlah permohonan yang telah diproses juga telah direkodkan iaitu sebanyak 983 buah permohonan (92.74%).

Berdasarkan data analisa yang diperolehi KOJADI pada akhir April 2016, seramai 1,060 peniaga telah memohon skim berkenaan. Namun demikian, daripada 1,060 permohonan, sebanyak 249 (23.49%) buah permohonan telah diluluskan dan dana sebanyak RM 43,580,000 telah diagihkan kepada 209 buah permohonan. Manakala sebanyak 595 (56.13%) buah permohonan telah ditolak kerana tidak memenuhi syarat-syarat permohonan.

Sehubungan dengan itu, KOJADI merancang menyediakan lebih banyak program dan inisiatif untuk membantu golongan ini dari segi kemahiran dalam perniagaan dan mengenalpasti jalan penyelesaian bagi mengekalkan atau meningkatkan prestasi perniagaan. Dengan menyediakan kemahiran pentadbiran perniagaan yang rasional dan

munasabah, KOJADI berharap dapat membantu lebih ramai usahawan kaum cina untuk berjaya dalam bidang perniagaan tersendiri.

Selain itu, KOJADI akan berganding bahu bersama Kolej Universiti Tunku Abdul Rahman (KUTAR) dalam melaksanakan tinjauan dan penyelidikan yang lebih menyeluruh untuk memperolehi testimonial daripada masyarakat kaum cina terhadap inisiatif dan pelan Kerajaan Malaysia dalam membantu mereka memperluaskan perniagaan.

Sekian, terima kasih.